

Trabounan di mantencion di edificionan di Stadhuis y Censo ta caba na augustus

Prome Minister a pone enfasis riba continuacion di servicio na publico



DIRECTOR di Monumentenzorg, Yvonne Webb-Kock a guia Minister President Mike Eman y Minister di Cultura Otmar Oduber diahuebs mainta den e recorrido haci na Stadhuis, Censo y edificio na Zoutmanstraat pa wak e avancen den e trabounan di mantencion y restauracion cu ta andando.

Sra. Webb-Kock a duna di conoce cu e proyecto di mantencion na e monumentonan conoci manera Mansion Arends y Hotel Colombia, como tambe e parti nobo mey mey, lo ta cla den luna di augustus. Stadhuis ta e prome proyecto cu e departamento di Monumentenzorg a restaura na 1989 y actualmente

a yega e momento cu tabata rekeri mantencion. E doño di e edificio ta Stichting Monumentenfonds cu ta financia e proyecto. Monumentenbureau, di nan banda, ta cay bou di Ministerio di Cultura. Despues di un destaho publico, e proyecto a keda den man di contratista Van Kessel Havenbouw. “Nos a cuminsa mey mey di januari; e ta un trabou intensivo cu ta rekeri un trabou poco poco cu atencion special,” Sra. Webb-Kock a splica. “Nos ta akinan pa muestra con leu e proyecto ta andando.” Actualmente ta pone tur atencion riba e edificio cu ta yama Hotel Colombia y cu ta inclui e cura tambe. Un storia interesante di e edificio aki ta cu e tabata e entrada di e prome teatro na aire liber na Aruba. Su doño tabata Sr. Nadi Henriquez y henter pueblo tabata invita pa bin wak. Pa paga nan entrada, hendenan tabata trece galiña y webo, entre otro. Nan tabata wak peliculanan mudo. E trabounan ta asina leu cu na cuminsamento di juni caba ta entrega e edificio cora. Despues ta sigui riba e edificio mey mey cu ta e parti nobo y e parti berde. “E intencion ta cu pa fin di augustus e proyecto ta cla,” asina e director di Monumentenzorg a bisa, añadiendo cu Minister President a pone hopi enfasis pa e trabounan wordo haci na un manera cu semper por keda habri y sirbi publico. Pa logra esey, algun di e trabounan di mantencion di murayanan ta wordo haci durante fin di siman.

